



九國志卷之六



宋

路振撰

前蜀

王宗裕



成都府

宗裕建武中屬幼從建入為牙校善道申絕甘分苦  
 得將志心大順二年與王宗祐克州遷青衣刺史建  
 伐梓潼為第二指揮使建親督諸軍力戰宗裕必冒  
 矢石以掖衛之東川平諸將爭功宗裕口未嘗言戰  
 謙和接下人皆服其沈厚為東川留守昭宗下詔加  
 以真命武成初召歸總成都城內外諸軍事其導從  
 不避成都尹崔隱隱懲其僕宗裕大怒入白建建曰

京尹五大長官汝有識之士也不能教戒參從反令我責大尹耶宗裕佹俛而出再為東川節度副大使斑白者携幼以迎于道封通王永平初建興師取秦鳳州再至縣谷宗裕饋輓貢獻道路相望建以其盡瘁明年乃改東川為武德軍以宗裕為節度使宗裕既秉旌鉞遂貪冒財貨以白金百兩作鋌鐫記年月每五鋌為一束以生牛革裹之子諫曰牛革著物堅確後難可開宗裕叱之曰何更開也罷歸衍慰諭久之自謂功高以征伐為己任築第蜀城中頗侵損民舍有酤者青陽家不徙去宗裕遣人以巨虺寘其舍中復投以溲穢酤者將訴於建宗裕懼而止又於郊

外開廣林莽壞掘邱墓立亭榭鑿池沼樹花木攜妓縱酒為樂一日方醉坐軒檻中見數人衣冠甚偉謂宗裕曰與君幽顯異路何相陵太過因相顧大笑宗裕亦笑遽仆於地寢疾不數日卒

### 王宗壽

宗壽建宗人之子幼從征伐警悟有機辯好琴碁篇什方術皆臻其妙建入蜀奏署懷節軍使以所部鎮過江原縣嘗於許汝間得一鐵鏡晦不可鑒屢令工人瑩之了無所睹著巾奩中有日矣至是忽覽之光采煥發因見市舍中小兒青衣水角獨坐宗壽異而使人召之小兒曰何以知我至此宗壽以言怛之

不懼因曰我與鐵鏡來耳公不見還神物終當化去  
君以還我他年當有報也宗壽出鏡與之乃長揖謝  
去後宗壽得辟毅行氣之術或謂小兒傳之乾寧初  
建令率所部兵平南充遂知果州事安輯離散得郡  
牧之體武成初封嘉王荆南高季昌畧地三峽建以  
壽為忠州節度使兼行營招討使以鐵鑠斷夷陵江  
季昌戰艦不能進宗壽禦之大敗荆人季昌奔歸以  
功加中書令宗壽性方正樂於貞退自歸成都以飛  
鍊自娛與孟繼平許寂楊珍為入室清談之友未幾  
為金吾上將軍持法平正院吏周郃受贓鬻獄宗壽  
捕鞫得其實郃以重貨求救於大閹為解宗壽不聽

竟棄郃市建討鳳翔以宗壽為第三招討使取陳倉  
還行襲位宗壽請閑久之衍沈酒色時宣華苑初成  
數為長夜飲宗壽在坐諫衍請以社稷為念少近盃  
酌因感激流涕佞臣潘在迎顧在珣韓昭等奏嘉王  
酒悲無恠也乃大為諧謔而罷後起為武信軍節度  
使破雞子槽賊擒其魁李茂章請納賂以求免宗壽  
曰吾歷官四十年未嘗受同寮之遺况爾賊乎遽命  
斬之唐師入境郭崇韜遣使遺宗壽書宗壽不納聞  
衍降乃治裝赴關時衍先次岐陽宗壽請於李嚴求  
謁衍衍見之泣下曰早從王言豈至今日及衍遇害  
奔入熊耳山依定林寺明宗即位請闕自陳賜與甚

厚授保義軍節度使行軍司馬上表請葬行許之初  
行至秦川驛母妻及子弟遇害者十八人並藁葬道  
左至是宗壽盡易棺斂縞素徒步親自營護偕葬於  
三趙村聞者義之明年授淄州刺史卒

### 王宗鑑

宗鑑建從子也以偏裨從建入閩州署都知兵馬  
使從征東川有功遷廣都鎮遏使天復中僖宗反正  
建令宗鑑以所部兵奔問行在授北路第二班馬步  
軍排陣使建親征山南以宗鑑為御營使師還留屯  
平利時岐將劉知俊等繼領大軍分路來攻由階成  
路奪固鎮糧宗侃唐襲等禦之至青泥嶺為知俊所

敗退保西縣會大雨漢江漲宗鑑自羅村得鄉導緣  
山而行數百里與宗播遇于鐵谷合軍出湯頭時知  
俊自斜谷山南直抵興州圍西縣軍人散掠巴中宗  
鑑與宗播襲之會建亦至遂解西縣之圍以功遷山  
南節度使同平章事從征秦鳳遷中書令衍襲偽位  
加太保乾德六年卒

### 王宗佶

宗佶豫章人本姓甘氏幼穎利建討徐堂舉於江西  
獲之憐其慧黠是時諸子未生遂收為養子每給事  
帳下後從建入閩中隨諸將征討有功補貔虎都指  
揮使遷嘉州刺史乾寧中建克緜州以宗佶為兵馬

留後尋加檢校太傅知節度事未幾移鎮梓州昭宗  
幸鳳翔建遣宗佶與宗滌等率步騎迎駕至山南降  
節度使王萬宏以功加檢校太尉武成初進爵為公  
拜開府守中書令宗佶恃其位隆地長頗專攻伐而  
諸將皆避之多樹朋黨策勲錄舊高下在心附順者  
超擢違戾者擠之散地及宗懿等兄弟成長內不自  
安遂與御史中丞鄭騫判官李綱謀求為方鎮欲  
為亂建知之因進封晉國公罷其機務宗佶憤怨陰  
養死士出入卧內將圖不軌鄭騫等又教宗佶求為  
大司馬盡總六軍并乞為儲貳表連上而亂甚不遜  
建未之罪也忽一日請對言詞甚悖建勉諭令出終

不肯去因此衛士撲殺之騫綱並賜死

### 王宗翰

宗翰建之姊子也本姓孟氏建為神策軍使僖宗封  
其姊為晉國夫人宗翰最被親愛建入蜀以宗翰為  
拱辰軍使累遷眉彭二州刺史封集王賜姓王氏授  
文成等州招討制置使宗翰好蓄妓妾後庭綵翠常  
百餘人性殘虐吞番刺彭州日部民史有胡讓莊號  
為沃饒宗翰殺史民而取之元膺之亂以兵入衛建  
令安撫元膺倉卒而死建疑宗翰殺之竟無自辯通  
正初授通義軍節度使同平章事守興元尹以杜堯  
嗣為之佐令規正焉宗翰於泉倉置寨於捍龍山與

上清寨相接分鄉兵屯守建畧地秦隴以宗翰為第一招討使拔大散關取陳倉耀兵三壘而還宗翰所為不法堯嗣多諫止之及為招討使請堯嗣同行至大散關堯嗣腹疾請歸府乃自木皮店沿流而去宗翰令以膠船載之中流而溺天漢元年宗漢被病若見堯嗣既而堂宇藩溷隨其大小皆堯嗣在焉疾遂亟數日卒

王宗滌

宗滌潁川人本姓華名洪建將入蜀募勇敢之士以宗滌為廐將宗滌膂力驍果輕財好施為士卒所推得隸神策軍為小校建入成都以宗滌領前鋒兵奪

星宿寨進攻七里亭以功奏授威信都指揮使邠州王行瑜與鳳翔李茂貞攻揚守亮於山南鳳州節度使滿存禦之為茂貞等所敗存與守亮退保山南茂貞逼之因同奔閬中建令宗滌率兵禦之破存等衆斬其將梁承裕俘數千人景福元年授邛州刺史為都指揮使攻九隴守亮遣將符昭率兵解九隴之圍直趨成都營三學山建亟召宗滌歸夜至古城去昭營數里乃多設更鼓遲明益張旗幟徧諸山谷昭疑蜀師不敢出戰宗滌命發機石擊昭營中聲震山谷昭恐懼乃夜遁去宗滌反攻九隴拔之後從建攻梓州宗滌以衆五萬先趨東川與岐將李繼徽遇於元

武宗滌擊敗之以功賜名五十三指揮之首梓州陷  
斬顧彥暉降其兵七萬餘衆遂以宗滌為東川留守  
光化初奏授東川知節度副大使事二年歸覲遂以  
疾乞解職建不許昭宗反正梁祖與崔胤叶通盡誅  
中官更相引兵輦轂之下咫尺不通昭宗密遣中官  
仇承坦諭旨於建建遣宗滌與宗佶宗播率步騎迎  
駕至山南逐王萬宏據其城授山南節度宗佶等以  
其功高構以飛語建疑之因至詰讓將加之罪宗滌  
對曰天下寇盜平矣是大王聽邪說誅功臣之秋也  
建曰昨在大謾天寨中已有不軌之言矣我念汝之  
勤尚為隱忍今又狂率如此豈憲章之所容也宗滌

不顧而起建因令人監歸本營明日盡削奪官爵流  
於松州既行縊之於城外營中將士聞之皆相對掩  
泣初建開國造端門新樓名曰紅樓采繪既畢都人  
士女競往觀之曰看畫紅樓建以宗滌得軍情復有  
是讖故誅之人稱其寃

王宗佶

宗佶許昌人本姓田名師世為鄉豪隸名忠武軍籍  
建為部將奏署宗佶決雲都兵馬使光啟中田令孜  
逼僖宗西幸道出陳倉建率宗佶同扈蹕又從建起  
閬中賜姓名討陳敬瑄敬瑄遣漢州刺史張頊領萬  
餘人來逆戰宗佶擊破之敗句惟立於學射山常昭



度來鎮西川敬瑄遣將山行章將兵六萬拒戰宗侃破之於浣寨緜州刺史常厚奪留東川顧彥暉旌節建令宗侃討之破其北寨厚奔緜谷奏授宗侃雅州刺史遷眉州團練使未幾授武信軍節度使建開國以宗侃有佐命功進侍中城內外都指揮使尋加中書令充北路行營都統岐將李彥琛寇漢川宗侃保安遠城與宗鑑等三將同破岐軍斬彥琛衍襲位封宗侃為魏王卒年六十六子承肇入洛為行軍司馬

王宗瑤

宗瑤字寶臣燕人也本姓姜名郅以騎射隸許昌軍籍中建擢為隊長建迎駕山南宗瑤以勇伉得隸左

神策軍能馬上盤槊長丈八尺每臨陣馳突人望而畏之遷威猛副兵馬使建入閬州為先鋒十九都都頭左威猛都知兵馬使賜姓王氏更今名軍至緜竹誘諸蠻酋帥塞諫等得其兵數千人破常厚授蜀州刺史昭宗幸石門詔建赴難以宗瑤為北路行營都指揮使奏授嘉州刺史天復中授武信軍節度使建開國加太子少傅後封臨淄郡王建病亟以宗瑤為金吾使參預顧命衍襲位授太傅嘗自作高冢遇暇則酣酒高歌於其中無疾忽一旦默坐而卒年六十七人以為知死

王宗播

宗播字昌遠上蔡汝陽人本姓許名存少有膽勇秦宗權據上蔡名募豪傑以宗播為裨校宗權為梁祖所破部下皆逃散宗播亡抵荊州聞郭禹在歸州頗完聚得士卒心遂往依焉禹知其材令統青州元從兵三萬人時襄州兵圍逼荊州靜江遊奕將牟權領眾屯清江源據大山列寨諸營危窘宗播言於禹請討權於是伏兵清江岸中遣列校蔡行能捨舟直抵山下權素輕行能整軍來戰行能遁歸舟中權盡銳逐之宗播發伏兵掩其後擒牟權收其軍寶以歸于禹禹大喜俄而荆帥張瓌求救於禹禹宗播率岐州兵解其圍禹度瓌懦弱因據其城秦宗權上蔡別將

常厚以數人由均房來攻夔州刺史毛湘棄城遁走保白帝厚圍之禹與宗播以十權子兵寨于南山以攻厚厚令夔校韓楚言罵禹禹不勝其辱宗播請以壯士五十人夜斫其營上赤甲山揭巨石投厚寨中厚恐懼與百人遁去遂破其寨復取夔州毛湘奔成都禹令捕韓楚言已為其妻所殺矣先是楚言妻李氏語其夫曰君嘗為常司空罵郭尚書今寨柵危急鋸解之苦旦夕至矣不如早為之所楚言不忍曰且看事勢李度楚言終不引決乃以及自後斷其首并殺二男一女曰無為他人所魚肉也遂自剄死禹聞之大驚駭為給棺殮刻石以旌之留行軍劉昌美

守夔州與宗播沂江而上郡縣望風而潰號宗播為許掃土禹至萬州賞功以宗播為萬州刺史宗播不得志居歲餘禹遣人偵之見宗播不治州務但出蹴踘乃曰萬州必背我勻脚力耳遣卒三百襲之宗播踰垣夜遁遲明其衆稍至遂保豐都禹攻之宗播奔成都建得之甚喜令以所部屯蜀州賜姓名奏授縣州刺史建討王萬宏以宗播為前鋒破金牛黑水西縣褒城四寨乘勝傳其城萬宏降以功奏授漢州刺史加檢校太保建即位改金吾衛上將軍領彭州團練使岐將劉知俊圍西縣宗播為四面招討馬步使夾旅讓水置連珠寨首尾相應以勁卒二百出五動

磴擊之岐軍大敗遷武信軍節度使又敗諸蠻於潘倉加兼中書令為三招討攻隴州降李繼岌封臨穎郡王被病歸建至其第執手曰北面開拓公之力也衍襲位授太子少傅乾德五年卒六十八

王宗鈇

宗鈇許昌人本姓李名武父裕為忠武軍小校鈇少無賴善騎射建募義兵迎駕得宗鈇以隸帳下至岐山屢有戰功署為隊長尋遷為裨將以勇過人號為武于路建入蜀賜姓名常寔左右遇敵必獨挑戰挾人奪馬而還遂為軍中所推建攻成都一日城內出數騎直抵七里橋宗鈇因躍馬奪關子門蜀將宗行

能策馬援槩而至將及宗鉢佯墜馬奪槩以刺行能徑走入城宗鉢遂之至門而還建慰勞久之撫背曰吾得成都當宥汝十死洎建開國授普州刺史性輕率好貨恃勇不法未周歲以訟免官歸成都

王宗弼

宗弼許州人本姓魏名宏夫以家籍隸忠武軍建討王仙芝尚君長皆在帳下建取閬中補義勇都十將賜姓名及入成都改左驍騎都知兵馬使累遷嘉眉二州刺史建征果州宗弼掠地于飛鳥為顧彥暉所獲彥暉責之曰王公見討而君為大將不能諫正何敢來見宗弼曰罪固當死但念平昔與相公有素故

敢來也彥暉笑而釋之先是岐將常厚攻梓州彥暉乞援于建建遣宗弼等援之臨行建謂宗弼曰汝等破賊彥暉必犒汝汝當報宴俟彥暉至營中則擒之俱來庶免後舉也宗弼如其約及將報宴而宗弼告之彥暉遂以疾辭故宗弼以為言於是厚待宗弼以為養子及彥暉兵敗建圍之益急彥暉弟彥瑤有武勇知其城必陷請彥暉聚族沈飲自裁無為它人之所魚肉一日城陷彥瑤仗劍入室宗弼與諸子尚在彥暉顧宗弼曰爾非我子可自求生也因壞垣而出彥瑤遂及彥暉與諸子而自剄建入梓州宗弼束身自歸建待之如故逾年復令將上軍再授嘉州刺

史封鉅鹿郡王天貞軍節度使衍襲位拜宮城內  
 外都指揮使判六軍事封齊王衍將往秦州宗弼曰  
 唐兵壓境秦州何可去耶又上表切諫衍怒擲之於  
 地衍次利州唐師已入散關陷鳳州衍遂遣三招討  
 屯三泉以拒唐師未戰三招討俱遁走因令宗弼守  
 綿谷而誅三招討宗弼遂與三招討同送款於魏王  
 乃還成都斬宋光嗣等函首送於魏王遷衍及母妻  
 于西宮貴戚納金寶進妓妾救死於宗弼者不可勝  
 計微有舛誤者咸遭戮焉盡輦內藏之寶貨歸于其  
 家魏王遣使徵犒軍錢數千萬宗弼輒斬之魏王甚  
 怒及王師至令其子承班齎衍玩用直百萬獻于魏  
 王并賂郭崇勳請以己為西川節度使魏王曰此我  
 家之物也焉用獻來魏王入城翌日數其不忠之罪  
 并其子斬之于毬場軍士取其尸鬻而食之先是蜀  
 有謠言曰我有一點藥其名為阿魏賣與十八子至  
 是宗弼背國歸唐果其驗也

王宗範

宗範本姓章氏幼喪父隨母周氏再適建為九夫人  
 宗範年十歲冒姓王氏及建開國立周氏為后宗範  
 沈厚寡言好延納名士親從軍晉暉以女妻之封夔  
 王加太子少師永平四年黎州蠻入寇以宗範為第  
 一招討使宗播宗壽副之乃以所賜金募果敢士出

邛崃關至潘倉大破蠻衆斬其首領趙嵯政追奔至山口城與宗壽合殺八千餘人擒蠻王子趙龍眉等三人以歸加中書令後隨行入洛至長安張籤為節度留後宗範以珍玩賂籤請復姓為猶子易名師範後唐天成初王宗壽改葬衍師範來弔贈宗壽不與齒後為雍州行軍司馬卒

周博雅

博雅潁川人唐光啟中為龍州司倉參軍考滿將歸闕以川路梗澁乃寓止縣谷建至博雅袖策謁建於軍門建素聞其名一見忻然接待甚厚置之賓席博雅因說建曰唐祚將終有土疆者恣為吞噬以疆併

弱然以僕觀之皆非濟世之具也明公御衆有術臨事能斷僕昨在龍川已為明公籌之矣自主上蒙塵明公親鞅乘龍匍匐棧道懷國壘以從周旋患難險阻之中勤亦至矣及論功受賞不過刺史今端守一隅坐待窘迫非君子豹變之象也且葭萌四會五達之郊非久安之地若不薄人人將薄我不如果閬地與民豪楊行遷為陳田之肘掖控扼扼要害不修職貢以明公臨之可一鼓而擒也得其地以廣形勝得其士以增卒伍此策之上不可失也建然之遂取閬中之地乃奏署博雅為叛官建赴成都為陳敬瑄所拒退無所保建甚危之博雅曰兵家勝負無常古者出

師自非晉重耳之賢豈有一戰而霸者今邛南城壁完粟支數歲取之可以斷蜀右臂願明公留意建曰吾少在戎行備知民意若無受鉞之將必謂自圖其利今欲請朝廷命將出征吾當助成其事博雅曰善乃令博雅作奏牘朝廷嘉之下詔褒獎乃授韋昭度西川節鉞令與建同討敬瑄割邛蜀黎雅四州為永平軍節度使使建壁靈池與王師戮力逾年會糧運不繼建欲請韋公班師因謂博雅曰韋公歸闕我當以塞劍門朝廷謂我何博雅曰今皇綱不振疆臣掣肘朝廷命令不出閨壺明公當折節為軍民計豈得顧此也於是建乃請韋公歸闕附而上表自陳急攻成都

克之奏授博雅觀察判官後出知渝州未幾詔加節度判官遷嘉州刺史建開國召拜成都尹遷御史中丞俄拜中書侍郎平章事建薨葬永陵博雅議山陵事俄請老遷左僕射出為永平軍節度使雲南安撫使依舊平章事卒年六十六博雅本名詳犯孟知祥名蜀史追之改

晉暉

暉許州人父和為忠武軍列校暉少有膽氣杜審權鎮許昌以暉為頭營十將從鹿晏宏迎駕至山南晏宏遲留不行暉素與建相善謂建曰鑿駕將回晏宏觀望不進而姑息吾輩甘言見誘苟不自圖去就禍

且及矣不如以所部兵為勤王之舉不尔為晏宏所累且宮車反正以吾輩為賊党何面目行於天下建然之遂俱行迎至三泉僖宗嘉之名其軍曰忠義以暉為指揮使隸右神策軍及再幸褒斜復統南營兵與建同為先鋒天子居梁暉統四都兵屯黑水修營棧道往來無阻朝廷慮其疆盛熾因罷拱衛授集州刺史以散其朋聚一歲之中凡歷數郡盖欲窘之也建開梓州遂往會焉建以暉為壕寨使建開國授武泰軍節度使同平章事黔中郡縣多屬涪陵比部員外郎陳凝為涪州守以暉制御中不帶涪州刺史遂不納牌印暉上疏歸之凝責授瀘州司戶暉招來逋竄

剗除蠱孽州民愛之罷上表請老日夕與親友宴談噉為娛嘗自言曰吾生罹多難學執干戈者為求飽暖耳今至此矣復有何望我嘗拔王宗魯於行陳今致位將相如復為王妃矣分封宏農郡王卒年七十九

張造

造長社人父公素齊州長史造幼好兵家之學年二十應募隸忠武軍從鹿宴宏出征及宴宏據褒中心無回志因與建謀曰吾輩遠離鄉土保聚無名今大駕將回主帥反側或隨其逃遁則皆賊也不如率眾拱衛以取美名建納之遣使上表僖宗驛召旌賞遂



參翊衛隸神策軍及再幸褒中以扈從功授萬州刺史道阻不能去會建起兵閬中以造為行軍司馬廣漢糧盡建慮軍情有變謀各據一郡以自固造首唱大義慰諭將士眾皆感悅龍紀初詔授行營諸軍馬步都虞侯遷茂州刺史從建討陳田引軍攻笮橋為朱敬瑄所敗歿于陣年四十五建以其死事聞詔贈司徒子彥昭為感德都知兵馬使從建收巴西破葛佐授劔州刺史建圍梓州彥昭攻堅力戰歿于陣建痛惜撫其尸以泣曰父死於前子繼於後忠勇之節出卿一門矣

張勳

勳長葛人善推步之學少隸忠武軍籍從討王仙芝以勇敢稱建以所部迎駕署勳義勇都判官復隸神策軍乃總占候之要著太一元精秘訣譌七十一首以獻僖宗奇之詔與建同列從建起閬中破德陽寨斬王彥儔時建屢為山行章所困勳每臨陣拔槊蒙輪殺十餘人敵為之稍却奏署定信軍都知兵馬使大順中與王宗保同破浣花寨建將入成都城中多亡命不逞之徒建恐其構亂乃令勳為諸都斬斫使兼左右廂都虞侯以誘掖鎮撫之勳既入城索無賴者得百餘人悉鞭其胷死者相藉中外帖然不敢偶語建即位厯眉邛二州刺史卒

李簡

簡許州長葛人少以驍勇隸忠武軍從鹿宴宏出征有功遷為列校建起閭中簡為義勇都副兵馬使大順二年陳田遣將屯犀浦簡以所部擊破之武定節度使楊守忠與常厚舉兵援陳田建令簡逆擊之相遇於鍾陽簡謂諸校曰賊遠來多疲及其未成列擊之遂整陣鳴鼓而進連破其七寨斬首千餘級擒其將楊知宥楊行立等獲其軍資甲馬不可勝計建攻毛湘於邛州以簡為前鋒晉原守任從誨領步騎二萬御救奄至解邛州之圍簡曰賊輕而驕正可用奇不勞與戰乃分步騎三千為兩翼潛河村俟其半過夾擊之從誨敗俘甲馬數千俄而邛州軍使任可知斬湘以降建令簡入城慰撫景福中彭州部將李堯率兵焚繁維以援常厚建令簡逆擊之臨陣斬堯遂進攻其城連拔七寨常遁走建獻捷于朝以簡為邛州刺史卒於治所

潘在迎

在迎字亞卿前蜀樞密使炕之子身長六尺精神警悟少任俠不修細行交結屠狗天復中起家節度押衙王建開國以為扈蹕軍使檢校司徒守羽林大將軍內皇城使唐宸構難謀害宿將委在迎以腹心黜者既行多以後命誅在迎妻徐氏后兄女也為營護

之獲免衍荒于酒色在迎與韓昭輩多預宴宮中自昏達旦王宗壽泣諫衍在迎等給以酒悲自是大臣結舌無敢言者王宗壽鎮果州以在迎為都指揮使知州事渠江賊杜處齊招納亡命據巴王城在迎討平之以功授果州團練使魏王繼岌平蜀補為右職知祥鎮成都復令典兵未幾出為蜀州刺史董璋遣使并韜於郡中置邸回易在迎給事蓋仁達盜官麥以逃誣告在迎因并韜密餽金于董璋知祥命執仁達送于蜀州在迎斬之尋今在迎以州兵按撫後田乃服藥下痢以疾告召歸知祥親臨問焉遂請致仕從之嘗謂人曰我于前蜀有誅唐宸安社稷功當合

秉旄鉞今逮事霸主親

鎮不得命矣夫

明德末卒於成都年五十五在迎

以財

發跡至於權門要地悉啗以厚利曰未必盡仗之但

其冷語爾

九國志卷之六終

九國志卷之七

宋路振撰

後蜀

趙季良

季良字德彰濟陰人父胤唐穀熟令季良幼涉書史  
 長于吏治尤善騎射王檀聞其名辟為保義軍節度  
 推官揚師厚鎮鄴署元氏令徙魏州都督府司錄參  
 軍後唐莊宗入鄴召見與語以季良有文武才畧即  
 授大理評事依舊司錄參軍充義勝都指揮使軍中  
 謀議多以諮之時兵革屢興屬邑租賦逋久一日莊  
 宗召至切責之季良對曰殿下何時當平河南莊宗

正色曰爾掌輿賦而稽緩安問我勝負乎季良曰殿下方謀攻守復務急徵一旦衆心有變恐河南非殿下所有莊宗斂容前席曰微君之言吾幾失吾大計自是益加禮遇遷興唐府少尹司祿參軍如故嘗夢手扶御座自謂輔佐之象繇是頗迷天時人事以諷莊宗深納其言及即位授光祿少卿兼洛南水陸營由都制置使明宗即位遷太僕卿會宰相任圜兼鹽鐵事薦季良為判官明年授檢校戶部尚書為西川官告使兼三川都轉運制置使知祥素重其名一見遂悅奏留為節度副使累表不許會李嚴來為監軍知祥深懷疑慮乃誅嚴而署季良為副使天成三年

明宗下詔徙季良為果州團練使知祥匿其詔書密上表留之明宗不能奪遂允其請自是傾心接待情好款洽或入謁稍晚知祥必顧左右曰副使來何遲也及至則讌語竟日每有謀議無不見從時朝廷以夏魯奇李仁矩分鎮遂闔季良言于知祥曰朝廷增兵二鎮張犄角之勢將有不測之變也公處親賢之地以忠信見疑儻失先機則禍不旋踵矣知祥曰計將安出季良曰我甲兵雖衆然而勢孤易動請與東川董璋合從先平遂闔則朝廷兵至我無內顧之憂矣知祥從之及王師入劔門而遂闔已平果無功而還及捷書至知祥匿之謂季良曰北軍漸迓奈何季

良徐曰北軍至縣州已來必遁知祥問其故對曰縣師千里饋運不繼彼勞我逸不走何待知祥大笑以捷書示之及克黔夔二州以季良為武泰軍節度使董璋率眾入廣漢知祥領兵拒之季良留守成都制置經度軍用無闕先是季良嘗與知祥從容語及璋植性狼戾下多怨憤若堅守一城攻之難克矣及聞璋起兵知祥憂形於色季良曰璋不守巢穴自來送死此天以璋授公也俄而璋果敗加檢校太保明宗崩知祥建號加特進守司空平章事宏文館大學士判三司昶襲位加守司徒領山南節度使行興元尹廣政九年卒年六十四謚文肅季良性寬厚居常無

喜愠之色母早亡事從母如所生季扎季友皆從弟也並寘位清顯所上遺表言不及私蜀人避之

趙庭隱

庭隱開封人世為卿家庭隱少知兵律尚氣義始事梁祖子友亮因擊鞠墜馬死庭隱董璋等十數人皆追赴汴州知其無過竟釋不問令給事左右末帝即位唐莊宗入鄴兩河對壘十有餘年時庭隱為邢州都監累立戰功節度使劉重霸嫉之誣庭隱將所部兵降于莊宗因械送汴州末帝知其非罪又重違邊臣之請乃貶庭隱于南陽未幾追復舊職王彥章守中都庭隱在其軍中及彥章敗庭隱為莊宗所獲將

以就戮大將夏魯奇奏曰此姓也其材可用遂釋之  
魏王繼岌討西川以庭隱為先鋒監押自入敵境即  
禁兵士燒廬舍剽財物蜀人德之魏王平成都錄其  
功奏授左廂馬步軍都指揮使知祥至蜀康延孝陷  
漢州遣庭隱率兵擊破之擒延孝檻送闕下知祥奏  
加檢校司空漢州刺史因留屯成都長興初明宗將  
議伐蜀乃以夏魯奇李仁矩分鎮遂闕以分其勢知  
祥令庭隱與李仁罕張業率步騎十萬經畧遂闕魯  
奇堅壁不出戰會唐師入劍門知祥急召庭隱令統  
銳兵五千至東川與董璋合軍以拒之至中路大寒  
士卒不能前庭隱撫諭勞問將卒皆奮遂營于普安  
深溝固柵以養銳一日唐師奄至又分兵斷三亞父  
水及土橋庭隱密遣軍中善射者五百人伏唐師之  
歸路乃領軍出營久而不戰至暮唐師退庭隱縱兵  
追之伏卒齊起表裏合擊唐師大敗初唐師之入劍  
門也內有堅壁外有勅敵遠近震駭及庭隱之捷人  
心乃安知祥遣使慰勞賜書以褒之明年別將平魯  
奇唐師至葭萌而還庭隱班師知祥親勞于郊翌日  
至其第錫賚甚厚即授昭武軍節度使留後以鎮過  
葭萌知祥送于北郊親舉觴以勸之在鎮踰月上言  
三泉餘寇盡去乞假一旅之師以拓漢中及秦鳳之  
地知祥荅書慰勉且令休息董璋襲廣漢將攻成都

時東川廩藏充實部下多敢死之士其來也衆皆畏之知祥親督諸將召庭隱為副以率勵士旅璋遺書庭隱而詐達于知祥以書授庭隱投書褚中曰此必反間之辭不足觀也竦擒董璋而後閱之與璋戰鷄蹤橋前頗為所挫庭隱偽遁璋逐之知祥與公鐸領兵繼進璋軍亂不成列庭隱後整陳與知祥公鐸合擊之璋軍大敗斬首數千級璋領數騎遁歸東川為部下所殺庭隱追至東川頓兵城下以待知祥梓州平以庭隱為節度使會李仁罕自遂州至求領東川庭隱將讓之知祥以庭隱功多且怒仁罕之貪悞遂自領兩川節度使以庭隱為保寧軍節度使以閻果蓬渠開五州隸之昶襲位李仁罕求總六軍將圖非望以庭隱為六軍副使以制之未幾仁罕誅死改衛聖諸軍指揮使明年移鎮東川廣政初加中書令庭隱久居大鎮積金帛鉅萬窮極奢侈不為制限營構臺榭役徒日數千計十年被病懇讓兵柄疏再上從之仍就第冊為宋王經歲不能起賜肩輿入朝既謁見昶感動涕泣賜金沃盥及繒錦加太師卒年六十六子崇祚崇韜

趙崇韜

崇韜少驍勇有父風累從征討有功署副兵馬使及庭隱卒昶以崇韜領衛聖諸軍使以襲父任廣德二



年周師復至境上昶以宗韜與控鶴指揮使袁可鈞同為北面招討宗韜率勵將士行陣整肅士卒有點其首為斧形者號曰破柴周師前鋒屢為宗韜所破至歸安而退二十七年王師來伐宗韜與李廷珪等率兵拒之遇王師于漢源宗韜策馬先登我師大敗宗韜力戰不止兵器皆斷折猶手擊殺數人為王師所擒

張業

業開封浚儀人性沈厚有果斷事梁為東頭供奉官時兩河兵革未息業頗領監護之任皆立戰功法令峻整士卒畏之莊宗入洛聞業有幹畧擢為列校繼

岌伐蜀以業監先鋒兵補右廂馬步軍都指揮使蜀平以所部兵駐成都知祥入蜀奏授檢校司空簡州刺史時蜀漢賊盜群起燒劫鎮戍百姓驚擾知祥遣業率兵捕之業令五家為小保五十家為大保旬日之內擒獲殆盡討夏魯奇于遂州以功授寧江軍節度使兵馬留後董璋襲成都業在夔州聞之率所部赴難東川平正授節鉞加檢校太傅明德初領右匡聖步軍都指揮使會武定興元兩鎮來附令業將兵二萬屯漢水業至褒梁分布寨柵控扼駱谷秦鳳諸隘會武定軍衙將與蒲谷鎮將任漢謙同謀導晉師入武定業遣戍卒擊走之昶襲位改武信軍節度使

同平章事是歲昶殺判六軍事李仁罕業仁罕之甥也昶慮其為變詔歸本道未幾召入依舊同平章事兼判度支新收征税多為主吏乾沒業作盜税法犯者十倍征之吏民不堪其命業多視事私第中宰相之門被桎梏者常滿昶知之遽除十倍之法業子繼昭好擊劍嘗與淨衆寺僧歸信同訪劍術士右匡聖指揮使孫漢韶與業不協告業與繼昭同謀不軌翌日令壯士就都堂擊殺之年五十六

武漳

漳字巨川太原文水人父玉汾州別駕漳少勇敢善騎射事莊宗為定寨都虞候莊宗以全軍援澤潞漳

與裨將數攻其別寨斬首千餘級擢太原衙前兵馬使改匡聖軍指揮使同光初從魏王繼岌入蜀因留成都知祥鎮蜀補衙內右第二指揮使天成初漳與張公鐸迎瓊華公主于北都中國兵革之後盜賊充斥漳被堅執銳通夕不寐至蜀改左第二指揮使奏授檢校僕射其後東討果閬北拓劍利漳屢有功授絳州刺史知祥開國改邛州遷山南節度使漳以褒中用武之地營田為急務乃鑿大洫以導泉源溉田數千頃人受其利入為奉鑾肅衛指揮使未幾改山南加同平章事廣政七年卒于治所年六十四漳質厚儉約所至有治迹俸入之外不營貲產蜀人稱之

李肇

肇汝陰人父璟唐神策兵馬使肇少以材勇從父征  
伐後隸宣武軍補左建牙都頭累轉陝虢馬步軍都  
指揮使莊宗平梁恢復平洛割宣武一軍隸于河東  
時知祥為北京留守待之甚厚同光中以所部兵從  
魏王繼岌討蜀蜀平班師康延孝至普安叛擁衆回  
據廣漢肇在其伍中延孝敗肇被俘而知祥親釋其  
縛擢為衙內都指揮使未幾奏授嘉州刺史長興初  
我師圍夏魯奇于遂州唐師未援劍門不守肇領兵  
赴普安以拒唐師不得進以功改漢州刺史駐軍緜  
谷明年董璋率兵攻成都軍勢甚盛遣使致書于肇

諭以禍福肇素不知書擲之于地曰此不過勸我  
爾因并其使殺之梓州平加昭武軍節度使昶襲位  
肇以足疾不即時來朝昶怒罷其軍權授太子少師  
致仕于邛州安置壩坎不得意廣政八年卒年七十

李仁罕

仁罕字德美陳留人少隸宣武軍為小校容貌瓌偉  
梁祖為四鎮節度署為衙內昭宗幸鳳翔梁祖遣仁  
罕奔問行在因修貢禮梁祖革命補宮苑儀鸞等使  
歷許蔡華三州馬步軍都指揮使莊宗伐蜀令監先  
鋒軍知祥領鎮奏授馬步軍都指揮使康延孝叛知  
祥命仁罕討平之以功授彭州刺史遷蜀州夏魯奇

鎮遂州稟朝廷之命繕治兵甲將圖蜀知祥與董璋謀先討魯奇令仁罕攻遂州拔之以仁罕為兵馬留後未幾承制授武信軍節度使又以所部兵定三峽走夔將安崇院知祥卒遺命仁罕輔政昶嗣位令判六軍事仁罕奉幼主無隱情自以先朝舊老遇事必諫時控鶴指揮使張公鐸內醫韓繼勳豐德庫使韓保貞弓箭庫使安思謙等皆昶在東府時舊所親狎素不為仁罕所禮皆懷怨怒每譖仁罕欲納王衍妃徐氏為側室遂誣以姦昶大怒俟仁罕入謁令武士擊殺之年六十二

李延厚

延厚洺州平恩人父及唐邢州別駕延厚少有膽略善騎射從父琮為洺州節度使率眾歸於梁祖延厚亦從焉梁補左拱辰指揮第二都頭後唐同光中所部兵從魏王入蜀改馬軍右驍銳第一指揮使康延孝入漢州知祥遣延厚率精兵二千會李仁罕往討之將行延厚集將卒于營中誓之曰今出師征討不三旬必破賊乃立功圖賞之日也士卒有誓國報恩不以家為慮者立東廂衰疾怯懦厭為征行者立西廂無自苦也得請行者七百人逐延孝西寨斬首百餘級竟拔其城以功奏授檢校右散騎常侍改右廂馬軍都指揮使歷陵果州刺史源州押衙文景琛

叛延厚討平之岐軍逼文州延厚率衆赴援即日解其圍昶襲位遷雅州刺史永平軍節度使未幾移鎮昭武軍廣政九年卒年六十一

張公鐸

公鐸太原樂平人父頊唐儀州兵馬使公鐸身長七尺侗儻有節義好文史之學知祥為北京留守錄為親從及出鎮成都補為牙校從高敬柔迎公主于晉陽轉義勝定遠都知兵馬使董璋舉兵襲我廣漢先鋒兵將至成都公鐸率諸軍從知祥逆戰于雞蹤橋我師不利公鐸率所部兵力戰直衝其腹璋兵大敗梓州平以功授簡州刺史遷奉聖控鶴都指揮使知

祥病公鐸與趙季良趙庭隱李肇等同受遺命輔政昶襲位授保寧軍節度使為政嚴猛寮吏畏憚時承前蜀之弊獄訟繁多案牘堆積公鐸量其所犯隨意裁決無不稱當在任六年民被其惠先是屬邑連歲多逋租公鐸詰其由乃豪民猾胥乾沒賦稅時令佐已有授代者公鐸悉勒止之令盡徵其租而後解由是不數月徵錢糧數萬貫斛時論以為嚴而不殘遷寧江軍節度使公鐸馭下嚴正宿衛二十餘年宮禁寧謐初染心疾昶憂之為玉局洞開靈寶壇親署青詞以醮焉廣政八年卒年六十二

張虔釗

虔釗遼州榆杜人父簡唐檢校尚書左僕射虔釗少以武勇事唐武皇莊宗之世累補左右突騎軍使莊宗嘗以偏師取鎮陽命虔釗率騎果為前鋒屢挫賊銳遂陷其城明宗即位以虔釗有將帥才擢為隨駕親軍都指揮使歷遼春二州刺史天成中鎮定節度王都阻兵連結契丹為邊患命虔釗為北面行營兵馬都監進討契丹殺傷甚衆虜不敢南下遂圍定州百日而城陷斬王都降其餘衆師還以功遷橫海軍節度使未幾移鎮山南兼西面諸州馬步軍都部署應順初閔帝即位以鳳翔節度使潞王從珂有異志發兵討之詔虔釗為犄角師次岐陽人心離散降于

從珂虔釗憤之乃退歸南鄭率孫漢韶以山南之地納款于蜀知祥遇之甚厚委以節鉞昶襲位加中書令歷左右匡聖馬步軍都指揮使出為昭武軍節度使及漢祖即位乃移鎮梁州以觀朝廷之變會晉昌軍節度使趙匡贊鳳翔節度使侯益俱謀歸蜀遂以虔釗為北面行營招討使應接經畧俄而趙匡贊侯益請昶出師掠定三秦因命虔釗與韓保貞等總師五萬出散關雄武軍節度使何重建出隴右奉鑾肅衛都虞侯李廷珪出子午谷會于雍州廷珪始出子午谷聞匡贊為王景崇所逼棄城自投東去遂先退師時虔釗福誠保貞師次陳倉謀不相協而侯益聞

匡贊已去廷珪班師亦誠疑中變閉壘不出司天監趙廷樞累以雲氣候不利諷于保貞保貞感之乃與福誠率所部取隴州道會重建歸蜀虔劉留寶難以勢孤不可深入遂班師士卒夜發部伍不整至興州自以功業不成感憤而卒年六十六

潘仁嗣

仁嗣浮陽東光人父廷訓密州都指揮使仁嗣少倜儻尚氣起家為保義軍兵馬使後唐魏王繼岌西伐仁嗣以所部兵從入蜀蜀平改左右廂馬步軍都指揮使知祥受節鉞留在麾下康延孝襲漢州知祥遣仁嗣率兵救之連破數寨遂屯于漢州董璋興兵趨

成都城外皆為敵境仁嗣以所部兵陣于赤水璋以全軍二萬擊之仁嗣大敗以十數騎潰圍而出身被十餘創卧于血中及璋敗獲免知祥親至其第以藥傅之明德二年奏授武定軍節度使源壁等州觀察營田處置等使之任卒于成都年四十六

龐福誠

福誠河東太谷人少善騎射倜儻交結豪俠傾竭家產中原兵亂福誠聚徒鄉里剽掠縣鎮知祥為北都留守署昭為太谷主簿令招諭福誠因相率歸附從知祥入蜀補衙內指揮使王師陷劍門從趙庭隱率兵據石橋福誠夜領數百人循水次東北上山攻王

師夾其腹背王師不虞其至舉軍驚擾因奮擊破之  
 以功遷茂州刺史知祥建國加檢校右散騎常侍租  
 襲位歷資縣邛三州刺史奉鑾肅衛馬步軍都指揮  
 使會張虔釗經畧秦中以福誠為行營馬步軍都虞  
 侯克寶難分兵吳山進攻隴州以歸改左驍騎軍都  
 指揮使武寧軍節度使廣政十五年授衛上將軍以  
 目疾罷卒年七十一

李彥琦

彥琦字子溫京兆長安人本姓楊氏祖父皆隸神策  
 軍彥琦善騎射有權畧唐中和初鳳翔李茂貞委以  
 心腹之任易姓李氏齒于諸子後昭宗西幸梁祖迎

駕攻逼岐下者累年及昭宗東還長圍方解大軍之  
 後府庫空竭彥琦請使甘州以通回鶻往復二載美  
 玉名馬相繼而至所獲萬計茂貞賴之劉知俊自靈  
 武班師途經長城嶺梁將率精銳數萬躡其後彥琦  
 與俊同設方畧擊敗之潞王之守岐下也諸道將急  
 攻其壘彥琦時在圍中罄家財以給軍用潞王篡位  
 以功授檢校太傅知河陽軍府事俄授鎮州兵馬留  
 後晉祖入洛彥琦罷職西歸家財素厚乃閉關自奉  
 游心釋氏專務散施廣政十年王景崇納款于蜀彥  
 琦因歸成都授左將軍維州刺史卒年八十八

孫欽



欽幽州安次人性忠烈善騎射少遇亂隸安義軍節度使充衙內都頭後改補合州衙內都頭兼土客都虞侯從本州刺史徐章入蜀會知祥鎮成都長興初轉充右截山都頭董璋來寇戰雞蹤橋有功遷普州刺史昶襲位累遷東川武德軍左奉聖都指揮使廣政十五年令以所部兵北征欽將行白于都監王承丕承丕將謀亂欲害判軍府事郭延鈞曰詰朝當領部卒二千人介胄閱于雄義營欲與府公觀之欽未知其由從容謂承丕曰卒閱習舊皆木刀竹槍今都監令執帶鎧甲將士臨行又是詔旨或有不虞如何承丕遂止又明日欽已具行裝入辭承丕承丕止之

同詣府中謁延鈞及延鈞送承丕上馬承丕頤指數卒擊殺延鈞自稱准詔處置軍府事即據府廳指揮放諸司罪人分遣將校領兵屯果閭縣劍州拒守劍門關發帑廩以賞將士自辰至巳亡命之徒應募而至者千餘人明日大會將校寮屬欽言于衆中曰郭延鈞既抵朝憲遠近未知其由公受命權總留務願出詔書以示軍府承丕曰作好官何問詔書欽知其已叛乃給之曰州城內外人情未安願為公督部下兵以伺察之因躍馬而出承丕連呼不止馳至本軍立召將士告其事遂率衆徑趨府中承丕左右皆奔散因擒斬之傳首成都加檢校太子賓客二十五年

寢疾卒年七十二

何重建

重建其先回紇之別部居雲朔間祖胤慶父懷福從後唐武皇世著勲闕因家于太原重建初事晉祖為奉德馬軍都指揮使歷驩睦曹三州刺史檢校司徒會延州節度使丁審琪殘暴貪冒蕃部苦之重建以所部兵攻其城審琪遁去晉祖即以重建權節度兵馬留後下車諭以威福邊民安堵就加彰武軍節度使累遷涇鄧貝澧孟五鎮節度使皆以廉儉簡易稱未幾移鎮秦州廣政十年契丹犯中原虜使齎偽詔至重建不勝其憤謂將吏曰吾事石氏二主八擁旄

節人臣之榮已極矣豈能交臂以事戎狄乃斬其使以秦成階三州歸款于我昶遣右千牛衛上將軍李繼勳馳往慰諭賜予甚厚加特進同平章事依前雄武軍節度使時固鎮與鳳州未平重建悉經畧討平之昶大舉兵北伐遣張虔鈞出大散關以重建為招討使由隴州路以進師無功而還堅請入覲昶不許二十一年加兼侍中卒年六十九

孫漢韶

漢韶太原人祖昉唐嵐州刺史父存進振武節度使漢韶幼有器局風儀峻整存進尤愛之起家安定軍使知祥留守晉陽屬蕃渾侵擾邊郡表令漢韶督軍

進討莊宗知其可用遂委以伐律大破虜寇擒獲甚衆以功授檢校右僕射蔡州刺史明宗即位遷彰國軍節度使觀察留後累遷昭武武定等軍節度使閔帝嗣位加特進漢韶以其父名上表讓之改檢校左僕射制曰改會稽之字抑有前聞換瓌寶之文非無故事及潞王入洛遂與張虔釗等奉表歸附及謁見與知祥叙汾上舊事及洛中更變相對感泣知祥曰豐沛故人相遇于此何樂如之于是賜第宅金帛供帳什物悉官給之授永平軍節度使昶襲位加同平章事明德三年入為匡聖馬步軍都指揮使廣政十年為山南節度使會何重建以秦階成三州歸附鳳

州石奉顯堅守不通我使昶遣漢韶入城宣慰號令嚴肅秋毫無犯駐數日乃還加檢校太師雄武軍節度使後以疾乞解兵柄封樂安郡王賜肩輿輿入謁卒年七十二漢韶忠勇有父風而重厚過之居藩閫皆有治迹始以去危即安委質于我頗竭股肱之力終保富貴識者多其淳慤

高彥儔

彥儔太原人少善騎射慷慨有大節知祥留守太原名為軍校從入成都授親衛指揮使昶襲位遷茂州刺史廣政十年秦州何重建以城降以彥儔領雄武軍節度使領衆守其城未幾召歸領右衛聖馬步軍

都指揮使十八年周師攻秦鳳以彥儔為北路行營  
招討使與李廷珪呂彥琦率兵赴援與周師遇于唐  
倉大戰我師敗績彥儔保退青泥嶺周師遂克階成  
秦鳳等州彥儔歸成都昶釋不問改寧江軍節度使  
二十七年王師來伐分兵由峽路攻夔州彥儔謂副  
使趙崇濟監軍武守謙曰北軍涉險遠來利在速戰  
宜堅壁待之守謙曰寇據我城下而不擊將何待也  
乃獨領麾下千餘人以出時王師頓白帝廟西遣騎  
將張廷翰引兵與守謙戰我師敗走廷翰乘勝登城  
彥儔整象將出拒戰王師已乘而入彥儔力戰于城  
下不勝身中十餘槍左右皆散去彥儔奔入府中反  
拒其門判官羅濟勸彥儔單騎歸蜀彥儔曰我昔已  
失天水今復不能守夔州總不忍殺我何面目見蜀  
人乎濟又勸其降彥儔曰老幼百口俱在成都以一  
人偷生舉族何負今日止有死爾即解符印授濟曰  
君自為計俄而王師壞門彥儔挺劍拒之殺十餘人  
于是登樓縱火自焚而死大將劉光人憐其忠蓋收  
其骨以葬焉

李廷珪

廷珪太原人幼慧黠七歲隸知祥帳下為給使從入  
蜀為牙軍指揮使征康延孝有功遷陵州刺史知祥  
征東川廷珪權領親軍以從董璋平轉資州刺史累

改眉蜀二州昶襲位遷捧聖控鶴都指揮使領興元節度使歷雅遂閬三鎮加兼侍中廣政十八年周師攻秦鳳以廷珪為北路行營都統高彥儔呂彥珂為招討廷珪遣先鋒指揮使李進以兵據馬嶺分兵出斜谷營于白澗將腹背以攻周師又遣染院使王巒領兵出唐倉與周師遇我師敗走王巒死之而馬嶺斜谷之兵聞之皆退奔高彥儔與諸將謀退守青泥嶺由是秦鳳階成之地皆陷于周矣廷珪上表請罪昶釋不問明年來朝遷左右衛聖諸軍馬步軍都指揮使仍分衛聖步騎為左右十軍以武定軍節度使呂彥珂為之使並隸于廷珪二十八年王師拔劔門加廷珪太子太傅令從元喆統兵以拒王師至緜州聞王昭遠趙崇韜之師皆敗元喆懼退保東川翌日奔歸成都所過盡焚其儲蓄及王師入成都行營都監王仁贍按籍詰所在軍資將歸罪于廷珪廷珪問計于部將康延澤曰吾觀王公志在聲色苟足其欲則置而不問矣廷珪素儉約不蓄妓樂遂求于姻戚家得女妓四人復假貸金帛直數百萬以遺仁贍繇是獲免歸朝為右千牛衛上將軍卒

王彥銖

彥銖太原人祖義方汾州長史父德誠贈太子少保彥銖性仁弱不好弄讀書究大義天祐中事知祥于

太原後入蜀累補節度押衙詔使李嚴之為監軍也  
密懷異謀知祥數其過命彥銖擒斬之嚴之左右無  
敢動者知祥破董璋擇腹心有權畧者俾護其軍于  
是以彥銖為東川監押及建國轉授右僕射昶襲位  
歷蓬嘉雅三州刺史出為山南兵都監數載罷歸補  
左右羅城使眉州刺史遷昭武軍節度使轉右衛聖  
馬軍都指揮使罷歸改左金吾衛上將軍復授昭武  
軍節度使廣政二十四年卒于治所年六十五

李奉虔

奉虔太原人本姓王氏祖欽唐隰州刺史父存賢佐  
唐武皇累著功因賜姓李氏梁人攻上黨莊宗親總

大軍以援之存賢先登陷州授盧龍軍節度使奉虔  
幼有才略不循小節年十四為幽州衙內都指揮使  
居父喪骨立數歲及知祥鎮蜀奉虔懇請從行補廳  
直左押衙明宗即位充貢奉使諸將進攻遂寧王師  
掩至劍門不守知祥命趙庭隱督兵往拒之署奉虔  
為兵馬監押時衆寡不敵人心動搖奉虔與庭隱率  
勵士卒竟敗王師以功授檢校右僕射昶襲位領嘉  
州刺史文思使遷右金吾衛大將軍為昭武軍都監  
屬夏秋多雨嘉陵江溢出城奉虔置堰開湍瀨二十  
餘處洩其蓄水築堤以護之城池克完人被其利授  
昭武軍節度自監護擁節旄自奉虔始人皆榮之入

為左右街功德使卒年六十三

王昭遠

昭遠成都人幼孤貧年十三依東都僧知諲為童子知祥入蜀飯僧于府署昭遠持巾履從知諲得入時昶方就學見昭遠聰慧留給事昶左右昶嗣位以為捲簾使遷諸司使會樞密使王處回得罪乃以昭遠為通奏使知樞密事機務一以委之府庫財帛恐其所取不問未幾遷山南節度使判官張廷偉言于昭遠曰公素無勲業一旦位至樞近不自建大功何以塞時論莫若遣人致書通好并門令其發兵南下我即自黃花子午谷出兵應之使中原表裏受敵可坐

有關右之地則君之功無有出其右者昭遠然之乃言于昶遣人間行齋蠟書以往太原為疆吏所獲及王師來伐昶令昭遠與韓保貞趙崇韜等領兵以抗王師昭遠好讀兵書頗以將略自任始發成都昶遣宰相李昊等餞于郊外昭遠酒酣攘臂而言曰是行也非止克敵當以此數萬彫面惡少取中原如反掌爾及行執鐵如意指揮軍事自方諸葛亮時王師已破劔門昭遠大懼俄與王師遇于漢源趙崇韜布陣將戰昭遠據胡牀不能起崇韜敗乃免胄棄甲走投東川為追騎所獲送闕下授左領軍大將軍開寶中卒

安思謙

思謙并州人幼事知祥于太原以勤恪聞知祥入蜀補為軍校昶襲位頗見親信歷簡邛彭三州刺史奉鑾控鶴馬步軍都指揮使武奉軍節度使未之任改左匡聖馬步軍都指揮使山南節度時鳳翔監軍王景崇以城歸順命思謙率兵應接且略地關中會漢兵圍鳳翔燒其雙門景崇遣使來求救昶遣思謙及韓保貞等率兵救之兵次右界漢兵屯寶雞城思謙令保貞分兵趨隴州逼汧陽以分其勢又遣先鋒將申貴等分兵走摸壁設伏時家林貴以數百人晨歷寶雞列陣以誘漢兵漢兵爭出戰貴偽遁漢兵逐之為伏卒所擊退入寶雞城思謙次渭水將引軍濟會羅喉保義軍與東相應掩我不備多殺士卒而漢兵復振思謙與諸將議曰糧儲將盡而賊勢且盛不如釋之以圖後舉遂班師十二月景崇又來告急昶復督思謙令進兵思謙請先運糧四十萬斛然後進軍昶覽表不悅謂左右曰古之良將因敵取資近者契丹以數十萬衆入中原豈先事飛輓耶揣思謙此意必不為朕進取也乃發興州乾渠渡糧食乃山南諸倉米數萬斛屯鳳州以益之思謙不得已遂進軍次大散關申貴以所部先進擊漢兵燒箭箬寨毀關道遁去貴盡銳追之及安都思謙進軍玉女潭又殺漢



兵千人漢兵退屯寶雞城思謙駐軍摸壁時保貞之師攻隴州不能下思謙遂遷延不進會漢兵陷鳳翔景崇死乃班師上表待罪昶釋不問召歸移鎮閬州仍留宿衛思謙以受任無狀為物議所薄頗不自安昶既誅張業宮禁門衛悉加嚴警思謙以其疑已頗惡之言多悖慢三子<sub>庚</sub>嗣裔恃父權恣橫國人畏之會翰林王藻乘間奏思謙出怨言將圖不軌昶懼翌日俟其入朝伏壯士擊殺之并其三子廣政十七年也

焦彥賓

彥賓字英服滄州清池人父軫唐兗海節度使彥賓少聰敏多智略事後唐武皇尤所委信及莊宗即位遷左監門衛將同正四方館使出護邢州兵知祥移鎮成都詔以彥賓為監軍使與知祥同入蜀康延孝據廣漢彥賓說知祥令召董璋與之協力討賊遂擒延孝明宗即位忿閹堅輩怙勢擅權先朝使四方及逃遁不出者皆就戮之死者殆盡彥賓為知祥保護獲免朝廷因以李嚴代之彥賓辭疾不歸朝知祥因令判都提學院事未幾轉左驍衛上將軍以年老乞代從之彥賓乃營別墅鑿池沼植蒲莢養魚以自給昶襲位以先君舊友命全給俸祿而不令覲謁俾遂其性廣政十五年卒年七十八

趙進

進定州人少以膽勇隸天雄軍籍時河北宿兵進累戰有功洎莊宗入洛猶在行間屯于清原祿既薄又不時給士卒多怨憤思亂者十七同光末與本軍皇甫暉等共推副趙在禮相率夜犯鄴城城中士卒莫有鬪志進等因陷其城未踰旬兵數萬在禮署進衙內都虞侯三城巡檢使莊宗遣元行欽以其言聞因詔明宗馳往招諭及入城乃共推戴遽有洛中之變天成初除貝州刺史鄴都衙內指揮使明年移典寧州屬度州叛遣進討平之遷雅州刺史知祥入蜀進來覲謁知祥以進始謀叛逆將誅之進大懼趙季良

諫曰莊宗季年天下思亂匪獨貝魏一境公國之懿親所宜責以干紀加其顯戮進自知必死歸命于我所宜撫納以責其後效知祥納之董璋之亂我師致討進戎服謁見而言曰進荷明公不殺之恩今日有所報矣請前蹈白刃及決命破賊乃署為前鋒監陣使先登立功璋平轉左衝山指揮使昶襲位歷忠鳳印普四州刺史石匡聖步軍都指揮使所至軍政修舉戍卒有疾苦者必撫問周悉當盛夏寒未嘗勞役將士以此樂為之用廣政十七年督部兵戍漢中逾月以疾聞召還卒于道年六十一

石處溫

處溫萬州人本波斯之種仕前蜀為利州司馬同光  
中知祥入蜀補萬州管內諸壇點檢指揮使率義兵  
同收峽路時通州大將王允瓊侵擾邊鄙及草寇杜  
景溫劫水鄉豪殺縣令年孟剽畧戶口焚燒村落處  
溫與諸軍討平之知祥遺書褒美轉寧江軍節度都  
知兵馬使萬州管內義軍都指揮使昶襲位遷獎州  
刺史處溫初據石市招納亡命遠近多歸之由是廣  
事耕懇常積穀數萬十石前後累獻軍糧二十餘萬  
石加之以寶貨昶嘉之加檢校司空未幾授萬州刺  
史移簡州卒年八十

孟思恭

思恭字近禮潁川人父彥暉嘗為許州獄吏前蜀王  
建嘗隸忠武軍坐事被繫謂彥暉曰卿能免我他日  
將厚報彥暉遂縱之令亡去及建霸蜀遣使迎之授  
簡州刺史遷漢州團練使思恭弱冠竒峭猿臂善射  
起家保信軍使建嘗集文武射苑中思恭屢中的建  
大悅賜衣服以其女妻之為附馬都尉累遷靜塞軍  
團練使王衍襲位為北路行營都指揮使知祥鎮蜀  
以其宗姓補先登指揮使以所部兵從董璋遣思恭  
分兵討集州誡之曰賊少則與戰賊衆則退守要害  
我將濟師及遇賊思恭與之戰不利退求濟師璋怒  
放思恭歸知祥免之明年隨趙庭隱破璋于雞蹤橋

以功改清遠指揮使昶襲位加檢校司空改雄義都  
指揮使屯梓州累遷飛棹都指揮使歷劔階忠三州  
刺史思恭有膽略善撫士卒廣政二十年為峽路行  
營都指揮使屯赤英山時秋暑未退思恭苦熱食冷  
物浴寒水致疾卒于任年七十二

申貴

貴潞州人弱冠有勇力初事李彥珂為帳下卒天成  
中歸于知祥累補定遠都頭從征伐身當矢石深為  
諸軍之所推許改決勝耀武指揮使昶襲位遷右衛  
聖都指揮使歷昌渝文眉四州刺史貴貪鄙殘虐所  
在聚斂財貨民不勝其弊典眉州受財鬻獄尤恣暴  
橫常指獄門謂左右曰此我家錢爐其不道如此初  
魚五縣巡檢令其子元寶與州吏許延祺誣搆民連  
賊枷禁以求賂被訴下獄責授貴維州司戶參軍馳  
驛發遣至犀浦賜自盡

九國志卷之七終

九國志卷之八

宋路振撰

東漢

蔚進

進太原人少有膂力身長七尺日行二百餘里高祖鎮并汾進以材官給事及高祖領軍令負羈勒開運末南行留進於太原為宗翊衛即受馬步軍指揮使鈞襲位領建寧軍節度使典親軍如故繼恩監國郭無為受詔輔尊世子無為與進不協出為代州刺史時無為專政繼恩潛欲圖之進知其必亂自以居親衛之地頗懷危感及有中山之命忻然即路未幾繼

恩遇弑國人皆以進為先見以城納款歸朝授左衛大將軍領檀州刺史卒年七十二進無他能惟掌兵方嚴所至不敗事劉氏四主以質直聞歸老中國祿二千石亦武夫之終吉也

張元徽

元徽邢州武安人少以沈勇隸本城為兵累轉至列校高祖鎮并汾召置帳下累從征討有功晉開運末破契丹於三交以功授代州刺史歷雲州防禦使遷代州與宗素相友善及崇建號領侍衛親軍遷武寧軍節度使宗舉兵南下將圖周室以元徽為前鋒與周師遇于巴公原元徽以東軍先登陷陣擒監軍使一人降其步卒千人而旋宗大褒賞之元徽乘勝復入馬倒為周師所擒殺之其麾下十餘騎畢力血戰奪其尸而出俄而宗眾亦敗先是前鋒兵將次巴公原一夕營中刁斗皆噉元徽亟遣詣宗大寨易之凡易數十皆噉而不可擊因以白崇怒曰故要吾金鈿耶遂止是夜有大星墜元徽營中明日果敗元徽沈厚有將帥材善撫士卒輕財好施雖爵祿豐厚而家無餘貲既而軍吏為立廟晉陽城西北偶塑其象歲時祀之見者必掩泣

鄭進

進開封陽武人身長七尺餘翹勇多力漢祖鎮并汾

以材官給事累從征討有功即位遷侍衛步軍都指揮使鈞襲位以先朝勲舊賜予彌厚進性慷慨重然諾好施家無餘貲繼元立馬峰典機密性鄙吝與進不協峯怒悉奪其兵柄進不堪辱詬之於朝繼元怒翌日送定襄安置遣人殺之於路

衛儔

儔吐渾族人少事鈞為蕃落小底善騎射驍果絕倫明書計通六蕃語鈞襲位遷如京使令專掌吐渾一軍以從征討所向多克捷虜援兵每至即遣儔居前鋒軍中凡布列烽燧措置寨柵皆儔為之繼元立為闕人衛德貴所嫉出為遼州刺史吐渾數千人遮道請留繼元不許自是一軍失帥不復可用矣儔少長蕃中不樂為郡頗出怨言繼元慮其為變潛遣人殺之

李隱

隱雁門人少以驍勇隸緣河十寨善騎射有膽略鈞襲位以軍功擢授馬步諸軍都引進使累從征討性純直未嘗曲事權要衛儔出知遼州隱惜其忠勇為倖臣所逐頗憤惋形於言德貴聞而惡之白於繼元即日送嵐州安置未幾殺之

九國志卷之八終

九國志卷之八終